

**UPA 2019/55: Aasakkut nalunaaquttap atorunnaarsinnissaa suliniutigileqqullugu
Naalakkersuisut peqquneqarnissaannik Inatsisartut aalajangiiffisassaattut
siunnersuut.**

pillugu

siunnersuutip aappassaaneerneqarnerani

Inatsisinut Ataatsimiititaliap

ISUMALIUTISSISSIONTAA

Inatsisinut Ataatsimiititaliap suliarinninnermini uku inuttarai:

Inatsisartunut ilaasortaq Anders Olsen, Siumut, Siulittaasoq
Inatsisartunut ilaasortaq Sofia Geisler, Inuit Ataqatigiit, Siulittaasup tullia
Inatsisartunut ilaasortaq Aleqa Hammond, Nunatta Qitornai
Inatsisartunut ilaasortaq Justus Hansen, Demokraatit
Inatsisartunut ilaasortaq Stine Egede, Inuit Ataqatigiit

1. Siunnersuut pillugu

Aasaanerani nalunaaquttap nikisinneqartarnerata atorunnaarsinnissaanik suliniuteqaqqullugit Naalakkersuisut siunnersuutikkut peqquneqarput.

Nukissamik sipaaruteqarnikkut iluaqtissartat ullumikkut killeqarnerat siunnersuuteqartup siunnersuumminut tunngavilersuummini tikkuarpa, taamatullu ukiut kingulliit ingerlanerini ilisimatuut misissuinerisa arlallit takutissimagaat nalunaaquttamik nikitsisarneq peqqinnissamut ajoquatasartoq.

Taamaattorli akunnattuungasoqannginnissaa eqqarsaatigalugu nunat ilaasa amerlasuut Kalaallit Nunaanni innuttaasut, inuutissarsiorut aamma oqartussaaffit ullaat tamaasa attaveqarfigisartagaasa aasaanerani nalunaaquttamik nikitsisarnermik aaqqissuussaannik malinninnissaq naapertuussorineqarnerusimavoq.

Taamaattorli aasaanerani nalunaaquttamik nikisitsisarnermik aaqqissuussap EU-mi atorunnaarsinneqarnissaal pillugu EU-kommissionip september 2018-imi siunnersuuteqarsimanera siunnersuuteqartumit maluginiaqquneqarpoq, taamaallunilu aasaanerani nalunaaquttamik nikisitsisarnerup Kalaallit Nunaanni atuutsiinnarneqarnissaanut tunngavissaaruttoq.

2. Naalakkersuisut akissuteqaataat

Nunarpassuit Kalaallit Nunaanni innuttaasut, inuussutissarsiuteqartut oqartussallu ulluinnarni attaveqarfigisartagaasa aassakkut nalunaaqutamik atuisarnerannik malinninnissaq ataatsimut isigalugu siunertamut naapertuunnerusutut Naalakkersuisunit suli isumaqarfigineqarpoq.

EU-mi aasaanerani nalunaaquttamik nikisitsisarneq atorunnaarsinneqassappat Kalaallit Nunaanni aasaanerani nalunaaquttamik atorunnaartsisinaanerup nalilersoqqinnissaq Naalakkersuisunit pissusissamisoorsorineqarpoq. Taamaattoqassappat aasaanerani nalunaaquttamik atorunnaarsitsineq inatsisitigut atugassarititaasut naapertorlugit pisinnaavoq.

Tamanna tunngavigalugu aalajangiiffigisassatut siunnersuutip itigartitsissutigineqarnissaq Naalakkersuisunit inassutigineqarpoq.

3. Aasaanerani nalunaaquttamik nikisitsisarnermik aaqqissuussineq pillugu

Aasaanerani nalunaaquttamik nikisitsisarnermik aaqqissuussinerit siullit Europami nunani assigiinngitsuni 1916-imi atuilersinneqarput. Taamanii sorsunnersuup siulliup kingornatigut ikummatissamik amigaateqarnerup nassataanik nukissamik sipaaruteqarnissaq siunertaasimavoq. Aasaaneranili nalunaaquttamik nikisitsisarnermik aaqqissuussineq ikummatissamik amigaateqarnerup qaangiukkiartornera ilutigalugu atorneerukkiartulertorpoq. Sorsunnersuup kingulliup kingorna aamma taamatut pisoqaqqippoq, kiisalu 70-ikkunni ikummatissamik amigaateqalernermi atorneqaqqilerluni – 70-ikkulli qaangiutereersut aasaanerani nalunaaquttamik nikisitsisarnernik aaqqissuussineq attatiinnarneqarluni.

EU aasaanerani nalunaaquttap nikisinneqartarneranut 1996-imi assigiissaarivoq, taamaallunilu aasaanerani nalunaaquttamik nikisitsisarneq nunani EU-mut ilaasortaasuni tamani ataatsikkut piffissamilu assigiissumi pisalerluni.

Ullumikkut nunarsuaq tamakkerlugu nunat 70-it missaanniittut aaqqissuussinermik atuisuupput.

Aasaanerani nalunaaquttap nikisinneqartarnerata eqqunneqarneranut pissutaavoq ullup qaamarngata unnuup tungaanut sapinggisamik atorluarneqarnissaa.

Ullumikkulli aasaanerani nalunaaquttamik nikisitsisarnerup, nukissanik sipaaruteqarnissaq eqqarsaatigalugu, sunniutai killeqalernikuupput, tamanna innaallagiaq ullumikkut qaammaqqusersornermut atorneqartoq qangaanerusumut sanilliullugu annikinnerummat. Pærit sipaarniutit kiisalu LED atorlugu qaammaqqusersuinerit allat siaruaasimanerisa innaallagissamik atuineq malunnaatilimmik annikillisissimavaat, qaammaqqusersuinerlu innaallagissamik atuinermut tamarmiusumut ilanngartuutaavallaarunnaarsimalluni.

Aaqqissuussinerup Danmarkimi innaallagissamik ukiumut atuineq, DONG Energy'p uittortagai malillugit, taamaallaat procentip ataatsip missaanik appartittarpaa.¹ Ilisimasat naapertorlugit aaqqissuussinerup nunami maani qanoq annertutigisumik nukissanik sipaaruteqaataatiginera qulaajarniarlugu misissuisoqarsimangilaq.

Siunnersuuteqartumit tikkuarneqartutut ilisimatusarnikkut misissuinerit arlallit takutissimavaat, aasaanerani nalunaaquttamik nikisitsisarnermik aaqqissuussinerup sunniutigisinnaasai pitsaanngitsut arlaliusut. Sunniutit taakku sininnerup akornuserneqarneranik timillu pissusilersorneranik allanguinermik aallaaveqarnerat ilimagineqarpoq. Misissuinerit taakku ilaat aalajangiiffigisassatut siunnersuummut tunngavilersuutini oqaatigineqarput.

Aasaaneranut ikaarsaarerup kinguneri pillugit misissuinerit tamarmiunngillat assortorneqarsinnaanngitsumik takutitsisut, misissuinerillu ilaat assortuussutaapput, tamannalu siunnersuuteqartumit siunnersuummut tunngavilersuutitigut maluginiaqquneqarpoq.

4. Aasaanerani nalunaaquttap nikisinneqartarneranik aaqqissuussap atorunnaarsinneqarnissaanik EU-Kommissionip siunnersuutaa

Siunnersuuteqartumit oqaatigineqartutut EU-mi ukiup affakkaartumik nalunaaquttamik ukiuuneranut aasaaneranullu nikisitsisarnerup atorunnaarsinneqarnissaa pillugu siunnersuummik EU-Kommissioni ulloq 12. september 2018-imi saqqummiussivoq. EU-mi nunat ataasiakkat ukiuunerani nalunaaqutaq nalinginnaasumik (tassa ukioq kaajallallugu) atugariumanerlugu, imaluunniit aasaanerani nalunaaqutaq nalinginnaasumik atugariumanerlugu siunnersuutip kinguneratut nammineerlutik toqqarsinnaalissavaat.

¹ Berlingske 29. oktober 2012

Malittuanik – aalajangiiffigisassatut siunnersuutip matuma saqqummiunneqarnerata kingorna – EU-Kommissionip siunnersuutaa Europa-parlamentimit akuersissutigineqarpoq. Tamanna ukioq manna ulloq 26. Marts pivoq.

Siunnersuutili piviusunngortinneqarsinnaaneranut EU-mi ministerrådip tapersiinissaq piumasagaataavoq.

Ministerrådili nangaanartoqartitsivoq. Aasaanerani nalunaaquttamik nikisitsisarnermik aaqqissuussaq atorunnaarsinneqassappat, ukiuunerani nalunaaquttap imaluunniit aasaanerani nalunaaquttap najoqqtatut atorneqarnissaq pillugu nunat ilaasortaasut isumaqatigiissuteqarnissaat ministerrådimit kissaatiginartinneqarpoq. Nunat ilaasa ukiuunerani nalunaaquttamik najoqqtatut malinninnissaq toqqarpassuk allallu aasaanerani nalunaaquttamik najoqqtatut malinninnissaq toqqarpassuk, EU-mi nalunaaquttap ingerlaqatigiiffii marlunnik ilaratarsinnaapput. EU-mi nalunaaquttap ingerlaqatigiiffii ullumikkut pingasuupput. Tamanna nunat akornanni killiligaanngitsumik niueqatigiinnermik ajornakusuulersitsissaq. Maannakkutullu isikkoqartillugu nalunaaquttamik ataatsimoorussamik najoqquataqarnissaq isumaqatigiinngiffiuvoq.

Tamannaagunaporlu EU-parlamentimi akuersissutiginninnermut atatillugu aasaanerani nalunaaquttamik nikisitsisarnermik aaqqissuussamik atorunnaarsitsinissap 2021-(imuugallartoq) kinguartinneqarnissaanik aalajangernermet tunngaviusoq.

EU-p aasaanerani nalunaaquttamik piffissap sivikitsup iluani atorunnaarsitsinissaq naatsorsuutigalugu siunnersuuteqartup siunnersuumminut tunngavilersummini oqaatigaa. Naatsorsuutiginninneq taanna amerlasuunit isumaqatigineqarunarpoq, ineriartulernerli maanna pisoq eqqarsaatigalugu tamatuma Inatsisartut qinersivianni matumani pinissaa qularnarseqqavoq.

5. Kalaallit Nunaanni nalunaaquttap ingerlaqatigiiffii assigiinngitsut pillugit

Nunatsinni nalunaaquttap ingerlaqatigiiffii assigiinngitsut pillugit ajornartorsiutip siunnersummik suliarinninnermut ilanngunneqarnissa partiip ataatsip siullermeerinninnermi kissaatigaa.

Aalajangiiffigisassatut siunnersummik saqqummiunneqarsimasumik matuminnga suliarinninnermi Kalaallit Nunaanni nalunaaquttap akunnerisa ingerlaqatigiiffiinik naleqqussaanissaq pillugu aalajangiinissaq ajornartoq ataatsimiititaliap paasivaa.

Taamaattorli ajornartorsiut pillugu ataatsimiititaliaq ima paasissutissiisinnaavoq:

Kalaallit Nunaata kitaani nalunaaquttamut atorneqartumut naleqqiullugu Ittoqqortoormiuni nalunaaqutaq naluneqanngitsutut nalunaaquttag akunnerinik marlunniq siulliuvoq.

Aamma Pituffimmi sakkutooqarfimmi nalunaaqutaq immikkut inissisimavoq, taamaalillunilu Kalaallit Nunaata kitaani nalunaaquttamut naleqqiulluni nalunaaquttag akunneranik ataatsimik kingulliulluni.

Kalaallit Nunaata suliassaqarfimmik suli tigusisimannginnera pissutaalluni Kalaallit Nunaanni nalunaaqutaqatigiinnik aalajangersaaneq suli naalagaaffimmit akisussaaffigineqartoq Naalakkersuisut § 37 tunngavigalugu apeqqummut akissumminni² paasissutissiissutigaat.

Naalakkersuisulli nunatta nalunaaqutaqatigiinnut arlalinnut maannakkut aggulunneqarsimaneranut tunngaviusut upternarsarneqarnissaat aammalu tamatuminnga attassiinnarnissamik pisariaqartitsinerup nalilorsorneqarnissaa pillugu naalagaaffeqatigiinni oqartussaasunik isumaqatigiissusiornissaq anguniarpaat. Tamatumani ilaatigut suliassaqarfiup Namminersorreq pillugu inatsimmi aalajangersakkat naapertorlugit tiguniarneqarsinnaanerata nalilorsorneqarnissaa anguniarlugu. Ilaatigullu maannakkut nunatta nalunaaqutaqatigiinnut arlalinnut aggulunneqarsimanerata allanngortinnagu attiinnarneqartariaqarnersoq naliliiffiginiarlugu.

Suliap tamatuma qaugu naammassineqarnissaa naatsorsuutigineqarsinnaanersoq Naalakkersuisunit naatsorsoruminaatsinneqarpoq.

6. Inatsisinut Ataatsimiititaliap inassuteqaataa

Siunnersuut akuerineqassasoq ataatsimiititaliap isumaqatigiittup inassutigaa.

Inatsisinut Ataatsimiititaliap taamatut oqaaseqaateqarluni siunnersuut aappassaaniigassanngortippaa.

² Nr. 50/2019

Anders Olsen

Siulittaasoq

Siumut

Sofia Geisler

Inuit Ataqatigiit

Justus Hansen *Demokraatit*

Stine Egede

Inuit Ataqatigiit

Aleqa Hammond

Nunatta Qitornai